

UTUSAN MALAYSIA

DATE: 28 / 01 / 2008

Kehilangan besar kepada Indonesia, Malaysia: PM

BT-28/1/2008
SUBANG: Datuk Seri Abdullah Ahmad Badawi menyampaikan ucapan takziah kepada keluarga Suharto dan rakyat Indonesia berikutan kematian bekas presiden republik itu.

Perdana Menteri turut merakamkan penghargaan terhadap bekas presiden itu yang banyak berjasa dalam membantu mengeratkan hubungan antara Malaysia dan Indonesia.

Abdullah menyifatkan pemergian Suharto, 86, yang lebih mesra dengan panggilan Pak Harto, sebagai satu kehilangan besar kepada kedua-dua negara.

"Kita amat menghargai hubungan baik itu yang diterajui Pak Harto kerana ia memberi banyak kebaikan kepada kedua-dua buah negara.

"Kita berdoa Allah mencucuri rahmat ke atas roh Allahyarham," kata Abdullah kepada pemberita sejurus tiba di Pangkalan Tentera Udara Diraja Malaysia, Subang, di sini, dari Davos, Switzerland, semalam.

Timbalan Perdana Menteri, Datuk Seri Najib Razak menyifatkan kematian Suharto suatu kehilangan besar kerana Allahyarham antara tokoh penting yang membuka lembaran baru hubungan Malaysia dan Indonesia.

"Jika kita singkap sejarah, beliau adalah pemimpin yang bertanggungjawab menamatkan konfrontasi dengan Malaysia, selain membantu menghapuskan ancaman komunis terhadap Malaysia.

"Di bawah kepemimpinan beliau, hubungan dua hala antara Malaysia dan Indonesia mula pesat dalam semua bidang," katanya selepas Majlis Bersama Pengerak Felda dan Pelancaran Gerak Kerja Barisan Nasional (BN) Kedah di Padang Terap.

Najib berkata, Malaysia terutang budi kepada Suharto kerana beliau memberikan banyak sumbangan kepada hubungan akrab kedua-dua negara.

Najib dan bekas Timbalan Perdana Menteri, Tun Musa Hitam akan menghadiri upacara pengebumian Suharto, sebagai wakil negara, hari ini.